



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателів, котры не вплатили ище пренумераты, просиме выровнати якнайскорше рахунки.

Уж вышол с печати иллюстрований **Календар „Лемка”** на 1936-ый рок.

Ціна одного календара выносит **50 гр.** При замовленях 10 календарей оплату почтову платит редакция.

Пренумерата в краю:
30 грешей місячно,
80 „ квартално
1.50 „ полрочно,
3 зл. рочно.
В Амерыці: 1 дол. рочно.
В Чехословакии:
2 кор. місячно, 10 кор. полрочно,
20 кор. рочно.
Ціны оголошень:
Ціла сторона 120 зл., 1/2 сто-
роны 60 зл., 1/4 стороны 35 зл.,
1/8 стор. 20 зл., 1/16 стор. 10 зл.;
оголошения малы за 1 мм. 20 гр.,
в тексті 30 гр., перед текстом
40 гр. При місячном и долшом
оголошеню значна знижка.
Контото чекове Нр. 404.155.

По смерти английского короля.

Миллион людей в похоронном походе.

Король английскый Юрий V., о котрого смерти доносили мы уж в попередном числі, помер в своєм дворци коло Лондону.

Тіло его перевезено дня 28. січня до Лондону. Сыны покойного короля, а медже нима и теперешный король Едвард VIII. шли цілу 8-кильметрову дорогу піше; таксамо со стации в Лондоні до катедры Вестминстер. Королева и решта королевской родины іхали в самоходах.

На улицах Лондону в часі похоронов держало порядок 7000 полициянтов. В катедрі Вестминстер тіло зложено на катафалку, обитом пурпуром. На домовині лежала королевска корона, высаждена 3000 дияментов.

В православной церкви на Бекинген отдали рускы емигранты, жиючи в Англии, послідный долг помершому королю через отслуженє заупокойного богослуженя. На богослуженю не было ни одного представителя советского правительства. Серед молячих ся были: великий князь Димитрий Павлович, князь Димитрий, княжна Катарина и много других.

О год. 10. мин. 10 рушил похорон с Вестминстер до Поддингстонской стации и в тот час знаменитый лондонскый дзвон „Биг-бян” зробил 70 ударов. В тот же самый момент послідовало 70 арматных выстрілов (Пок. король прожил 70 літ).

Улицы, через котры переходил поход, были удекорованы маштами и жалобныма фиолетовой барвы хоругвами. В окнах склепов были поміщены портреты короля в жалобных рамах и в квітах.

Порядок походу.

Першими за тілом ишли: англ. король Едвард, его братя, король норвекскый Гаакон,

король Дании Христиан, король бельгийскый Леопольд и король румунскый, Кароль.

За королями ишол французскый президент Лебрен, генерал польской армии К. Сосновскый, югославскый регент кн. Павел, австрийскый вице-канцлер Штаренберг, чехословацкый делегат Ян Массарик, маршал Советов Тухачевскый, грецкы князі Павел и Георг, нім. министр загр. діл барон фон Нейрат и други.

В Виндзорі.

О 11 год. 45 мин. останкы короля переложено до вагона Поддингтонской стации. О 12 год. 15 мин. поїзд прибыл до Виндзор. О год. 13.15 мин. перенесено тіло короля до каплицы Святого Георга, где отслужено послідну панихиду.

В тот момент, коли домовину с останками короля клали в могилу роздали ся выстрілы армат. С тым выстрілом на цілой британской империи наступили 2 минуты молчаня. Молчанє перервал по 2 минутах новый арматный выстріл.

С фронту италиянско-абисинского. Страшна масакра под Макалє:

В минувшом тыждні начал ся на полночном фронті под місцевостью Макалє кривавый бой, котрый тревал 3 дні и єст зачисланный до найстрашнійших в цілой войні италиянско-абисинской.

Бой начали абисынцы ударом на италиянскы войска. В бою по стороні абисынцов приняло участь 25 тысяч чорных воєвников. Удар был так сильный, же пер-

шого дня италиянскы отділы мусіли уступити. В другом дні италияны достали подкріпленя и начали контрофензиву при помочи армат, самолетов и машинных карабинов, сіючи в абисинских рядах смерть и знищенє. Пак піхота припустила атаку на абисынску армию. Вывязал ся завзятый бой на багнеты.

Якы были послідства той трохдневной масакры? Инши цыфры подают италияны, а инши абисынцы. Віроятно по стороні абисынцов страты выносят около 5 тысяч убитыма и раненыма, а по стороні италиянов понад 1 тысяч. Помимо того однак побідителями уважают абисынцов.

Начата недавно италиянска офензива на полудневом фронті єст приостановлена.

Акція Т-ва П. Б. П. Ш. Н. в ділі будовы народных школ.

Одном барз поважном причином, вспиняючом належите розвитє народных школ и реализацию вселюдности научаня єст мале число школьных будынков и лекцийных комнат.

Тому недостаткови може зарадити лем интенсивна акція будовы школ, котру мусит ся вести помимо господарчой кризи. Закон с дня 17. лютого 1922. р. накладат на громады обовязок будовы школ при помочи с стороны Скарбу Державы. Держава однак выдаткує с бюджета великы сумы на оплату учительских етатов и не може тепер дотувати акции будовы школ.

В том положеню пришло с помочом населенє, основуючи в р. 1933. Товариство Поддержкы Будовы Публичных Школ Народных. Ціль того товариства єст помагати сельским громадам и містам в акции будовы школ через: 1) уділянє терыторияльным самоуправам долготерминных и безпроцентных пожичок на будову новых школ 2) уді-

ляне запомог на тоту саму ціль. Фонды, котрыма Т-во розполагат, складают ся с членских складок (по 4 зл. рочно) со значков на школьны свідоцтва, оплат от школьных книжок, импрез и т. д.

Треба признати, же в першом ряді Т-ва стануло учительство народных школ, котре не лем через своє членство дало основы Т-ву, але также єст головным организатором кружков в терені. Ему належит признати поважны доходовы позиции, пльвучи от школьной молодежи, котра в каждой школі и в каждой клясі творит кружки участников Т-ва.

Назагал заобсервовано, же місто приймає жившу участь, як село в акции финансовой помочи на ціли будовы школ, котра в нашом окрузі школьном має поза собом поважны позиции, — выказуючи, же в р. 1935. в окрузі новосандецком достало пожичкы 19 місцевостей на суму 35 тысяч злотых и 4 місцевости запомогу на суму 20 тысяч 300 зл.

Разом округ новосандецкый одержал в р. 1935 суму 55 тысяч 300 зл. Если возьме ся под увагу, же загальний кошт будовы школ в р. 1935. выносил 154 тысяч 661 зл., то переконаме ся, же участь Т-ва в финансованю будовы школ єст барз поважна.

В интересі дальшого розвита той акции, населенє повинно живо заинтересовати ся Т-вом и жертвуючи малы сумы на ціли Т-ва, памятати, же буде сильну Державу, оперту на просвіченых гражданах.

Аджек не жалуйме гроша на ціли Т-ва П. Б. П. Ш. Н.!

Не мають счастья.

В осени 1935. всі світовы, а особливо англицкы и французскы газеты писали широко о том, што бывший с ласкы Німцов украинский „гетьман“ Павло Скоропадский и его права рука, Владимир Коростовец мали барз неприємный и ганьбячий процес перед сто-

личным англицкым судом с англицком Туфнелем, в котром то процесі выявило ся, што оба тоты велькы світила украинской державности до сполкы с тым Туфнелем цыганили гроши от неосвідомленых англичан под предлогом политычной украинской агитации, а собраны гроши уживали для себе.

С той нагоды газеты світовы, а также деякы наши назвали „гетьмана“ Скоропадского ошустом, авантюриком, шантажистом и т. д.

Барз не в смак было то нашому „Украинському Бескиду“, котрый аж в двох числах осеньом 1935. р. а то в числі 42 и 43. як мог так боронил „гетьмана всієї України“, писал што всьо то неправда и выдумка гетманских ворогов, а кромі того грозно заповідає, што „гетьман“ поручил своим адвокатам притягнути до судовой отвічательности выдавництва, што помістили брехливы и напастливы информации, взглядно пресову агенцию, што их в світ пустила. Вкортці с Лондона надойде отпис судового протокола и т. п. необходимых документов для ужитку суда.

Але якоси минат пару долгых місяцов, а „гетьманскы адвокаты“ не выступають с процесами против тых газет, котры назвали „гетьмана“ так негарді и якоси не присылають тых судовых протоколов, котры мали „гетьмана“ так очистити.

Прикро признати ся, но не мають наши „самостійники“ стастя до кандыдатов на украинский державный пресгол. Вильгельм Габсбург „себто“ Василь Вышиваний спаскудил свою фамелию и своих вірноподданных галицкых украинцов перед судом французским, а Скоропадский своих „закордонців“ перед судом англицкым.

Барз побожны.

На днях помер в львовском вязничном шпиталю Владимир Герета, член украинской террорыстычной организации т. зв. „Органи-

зации Украинских Националистов, котра на совісти своей має численны убийства, подпаленя и инши злочины.

Герета сідил за того, што на порученє той организации замордовал украинку, дочку священника Ковалюка и студента Копача, а также приготавливал ся мордовати украинца, студента прав, Дмитерку в Подбережцах коло Львова, за того, што будьтобы они были довіренима державной полициии и здраджовали перед ньом пляны украинских террорыстов.

Соботняшне (25. січня) „Діло“, орган украинского „Унда“, котрого послы засідають в варшавском сеймі и так часто співають на нуту льяольности и згоды украинцов с Польщом, повідомило, што в неділю дня 26. січня о год. 12. в полудне в катедральном соборі св. Юра во Львові буде отслужена за упокой души Владимира Гереты па-нахида.

Барз побожны и богочестивы сут тоты „каноники“ под боком метрополиты Шептыцкого, што так ревно молят ся за души таких преступников, котры людей мордуют як куры, но замічательно лем того, длячого молитвы свои они так наперед оголошуют аж в газетах. О том напишеме другим разом.

ЦИ КУПИЛИ ВЫ УЖ
КАЛЕНДАР
ЛЕМКА
на 1936 рок?

ЕСЛИ НІ, ТО ЗРОБТЕ ТОТО,
ЯК НАЙСКОРШЕ!

КАЛЕНДАР КОШТУЄ ЛЕМ ВСЬОГО
50 грошей.

ПИСМО СВАТА АСАФАТА.

Русь перешла много бід! Были у нас татары и туркы и шведы и французы, были и свои „смуты“ — але все якоси Русь вышла с тых заверух побідоносно и 1000 літ пережила и уж ей иде на другу тысячку. Правда не всі ей діти сут разом и не всі жиют в згоді, але с того ище не мож мірковати, же Русь слабне. Напротив — в несчастью ци в борбі люды ся гартуют — то и Рус ся гартує — бо ище має велику задачу на світі выполнити.

Маме на нашой Галицкой Руси и в Карпатской тыж своих врагов, што недавно, бо лем дакых пядесят літ существуют. Вшиткы их знали. Пядесят літ тому назад ище ся не звали так як тепер, бесідовали по „рускы“, гнет за пару літ до того „руский“ додали несъмילו „украинский“ и говорили або писали „русско-украинский“ — аж в часі великой войны переоначили назву — на чисто украинский. А то вшитко с помочом Німцов. Німцы давали (и дають до днес) гроши ріжным кепским украинским политыкам, а тоты зас кричали в віденском парламенті, же ніт Руси, ани Руснаков лем украинцы. Німцы были ради с того бо така политыка на их руку (ослабити Русь), бо мали пред ньом страх и teraz мають. То тыж министры царскы в Відню гласкали и стискали руки всякым Левцкым, Будзиновским, Романчукам за того, же ся вырекли матари — Руси.

И посыпали ся гроши на украинскы школы на украинскы товариства, на „Просвіту“. А украинскы политыкы авансовали на гофратов. Перед нами были двери позамыканы, нам недали жадной субсидии на наши общества просвітительны, культурны ци экономичны, бо гайдамацкы лидеры клеветали, доносили на нас, же мы маме змову с москалем и хцеме цисара здрадити.

Пришло до того, же нас зачала жандармерия слідити, переслідувати, а потом такой арестовати и о здраду судити. Но и наконец пришол Талергоф!... Вот до того допровадила сліпота и брак трезвого змысла у украинских головачей.

Як відомо, Австрия и Німцы бояли ся Росии. Бояли ся, бо Росия стремилась до того, жебы ся укріпити на Балканах. Росия мала уж постановлено от давна заняти Цареград. До того самого перли Австрия и Німцы. То была тыж одна с причин світовой войны. Украинскы кепскы политыкы запевняли австрийских министров, же лем войну зачнут, то ціла Украина „от Карпат аж по Кавказ“ повстане и с процесием и хоругвами выйде пред „освободителей“. Но и як было не поперати украинских верховодов: Василькоз, Петрушевичей, Левицкых. А до того — свободный престол „короля Украины“ для одного Габсбурга — интерес кокосовый.

1914 рок. Страшна война. Правда же Украина не повстала. Австрия за Карпаты погнала, але и Росия мусіла ся цофнути. Відомо — німец може не сильнійший был — але мудрійший и сорганизованный. Заняли німцы а при них и австрийцы цілу днешну Польщу и Украину аж по Києв. Розсіли ся як на своей землі и давай рабовати и вывозити, што ся дало. В Німеччині и в Австрии не было што істи, цывильный народ голодовал а и войско тыж, але Украина поперла. Хліб, картофлі, статок, масло, загально всьо, што ся дало с'істи, вывезли німцы до своего краю, а народ на Україні голодовал. Але украинскы политыкы не голодовали — им ся барз добре поводило. Што их обходил народ.

(Продолженє в слід. числі)

Про Апостольску Администрацию Лемковщины.

Днеска видиме ошибку давной духовной управы на Лемковщині: насильна украинизация, загонистость, замала чуткость управителя. Днеска видиме также и наслідства ошибок: страшне моральне знищенє Лемковщины. В послідной хвилі, коли Лемковщина уж лежала в руині, компетентны власти пришли ей с помочом в формі установления Апостольской Администрации. Тота помоч хоц припозднена, але ище добра, якбы не инша вража работа.

Як уж стало певным, што Лемкы достанут Апостольского Администратора, котрый што до власти єст равный митрополиті, бо подлагат непосредно Папі Римскому, шмарили ся украинскы газеты на Апостольску Администрацию и Апостольск. Администратора с всякыма лайками, клеветати, а навет за „гадючи фонды“ почато во Львові выдавати малу украинску газету „Наш Лемко“, яка має стало гавкати на Апостольского Администратора. Тоту песячу роботу розмаитыма штуками подперают большевицкы ячейкы, яких на Лемковщині єсть дост дуже.

На тото вчитко не озерат ся Апостольский Администратор, лем своє робит так, як заповіл в своем першом посланю, робит розважно, пильно и все доцільно. Барз тяжка тота работа, бо поламане тяжко направити. Не даст ся она ту подробно описати, бо днеска не вольно ище висвітляти ей публично. Погодивше история на основі канцелярийных актов мусит выдати о ней гардый осуд. Днеска, яко певне, можна зрадити, што наш Найдостойнійший Апостольский Администратор барз на тото смотрит, штобы не пополнил якої ошибки такой, яку пополнил єго попередник, Гперемыский епископ. Кебы лем Пан Бог дал єму кріпке здравє, то сполнит своє трудне посланництво.

Люды доброй волі! як будете видіти, што дашто дотычно церкви не так иде, як має ити, пиште нашому Найдостойнійшому Архипастыру в замкненом письмі, бо он не може всяди быти и всьо знати! Каждє письмо, яке прийде до єго канцелярии, сам отверат и читат, а як треба, каже справу розслідити, а потом рішат. Нич не уйде єго увагы и никто не втече, як завинил, достане своє, хоцбы нераз долше треба было ждати на вымір справедливости. Плятого не розумно зробил тот господин, котрый в Лемку Ч. 3. написал статью „церков ци концертова саля“. Треба было, як автор статі добре хотіл, написати до Апостольской Администрации, што там и там зашло таке. Не можна операти уредованє на газетах.

Ище и тото не завадит знати, што наш Апостоль. Администратор все всесторонно справу розберат, закля ю рішит, длытого не боит ся погроз. Што до церковного майна, або грошей, то єст звязаный присягом, длытого не може зроби́ти никому нияких уступок.

Хоц ище долго-долго треба працювати, штобы на Лемковщині вернули ся давны времена, але уж днеска, по рокови тяжкой працы, видно выразный зворот на ліпше.

о. І. Полянскый
Канцлер.

* * *

Повысьше поміщаме без змін одержанє писмо. От себе зазначаєм однак, же минул уж перешло рок от часу утворе-

ня Апостольской Администрации, а народ не видит нияких змін на ліпше и починат трагити віру в слова и приречєня Апостольского Администратора. Народ жадат діл, не слов.



СМЕРЕКОВЕЦ, ПОВІТ ГОРЛИЦЫ.

Дня 29.XII. отбыло ся в Смерековци Общє Собранє членов читальні им. М. Качковского. На собранє явили ся праві всі члены и много инших селян, котры вступили в члены читальні.

Собранє открыл председатель Василь Пыртей и перевел выбор правления на час собрания. Доклад касовый выголосил г. Григорий Станчак, а доклад о загельной деятельности читальні за минувший рок г. М. Федорко.

Г. Т. Ядловский выголосил реферат о значеню читальні в селі, а г. Иван Астряб — о значеню организации в народі.

По уділеню уступаючому выділу абсолютории, выбрано новый выділ, до котрого вошли: Председатель: Пыртей Василь, заст. председателя: Златыканич Дмитро, секретар: Станчак Григорий, библиотекарь: Землян Папро, касиєр: Ворона Иван. До контрольной комиссии выбрано: Пыртей Гаврила, Ядловского Василя и Дуду Киприяна.

Присутны розвинули широку дыскусию над основанєм молочарні, заведенєм овецевых садов и сорганизованєм конкурсу буракового.

Собранє окончено отспіванєм гимна: „Пора за Русь“!

Присутный.



ВОРОБЛИК КОРОЛЕВСКИЙ ПОВ. КОРОСНО.

Дня 5.I. 1936. состоило ся в Вороблику Кор. собранє членов чит. им. Качковского. Собранє открыл предс. Петро Вархоляк. Председателем Собрания выбрано упр. школы г. Стефана Барну, секр. Анну Копчак.

Г. Ст. Барна, обнимаючи председательство, представил в коротких словах заслуги пок. Гр. С. Мальца и свящ. К. Н. Чайковского, а Собр. почтило память тых двох русских патриотов 1-дно минутным молчанєм. Дальше предс. Собр. в долшом докладі представил историю основаня Общества пок. М. Качковского и пояснил девиз Т-ва „моли ся, учи ся, труди ся, трезви ся“.

По том докладі приступлено до діловой части Собрания. С доклада библиотеки узнали мы, што чит. має библиотеку с 300 томов. Доклад касовый, выголошенный касиєром Сп. Драганом, выказал, што материальный стан чит. в отчетном році значно поправил ся. (Доход: 582.29 зл., расход: 440.20 зл.).

Доклад о деятельности чит. выголосил секр. Управы студ. Роман Барна. Доклад был всесторонно вичерпующий, в котром докладчик належито освѣтил так материальну як и духому сторону чит. — всі ей добры и злы стороны. Закончил доклад призывом до дальшой успішной працы на народной ниві.

По уділеню абсолютории уступаючому выділу, выбрано новый, в склад котрого вошли: Алексей Михневич, яко предс., Спиридион Драган, яко заст. предс. — Роман Барна, яко секр. — Андрей Струс, яко касиєр — Анна Копчак, яко библиот. — Дмитро Палюх и Копчак Иван, яко заступники. —

Контрольна комиссия: Лев Барна, Юрий Каршневич и Иван Палюх.

В селі находит ся „Сільский Господар“, діятельность котрого ограничат ся до бойкота рускых инстытуции и до постоянных нападков в газетах, особенно в газ. „Наш Лемко“ на наши инстытуции а в головной мірі на О. Канцлера И. Полянского. Штобы всім тым клеветам дати належный отпор, загальне Собр. членов чит. приняло слідуючу резолюцию:

В виду постоянно появляючих ся в украинскых газетах, а особенно в газ. „Наш Лемко“ дописей с Вороблика Кор. с нападками на О. Канцлера Полянского, рускы инстытуции и их поодынокых членов, в котрых хулиганы и обаламучены нима, физычно и умственно упосліджены индивидуа в роді тых, котры подписали послідны дописи в „Нашім Лемку“ — Заг. Собр. членов читальні им. М. Качковского в Вороблику Кор. стверджат, што всі тоты нападкы являют ся злым вымыслом одыниц, котры в мутной воді хотят ловити рибу. Заг. Собр. по той причині высказує Высокопреподобному О. Канц. Й. Полянскому сочувствие а заразом полну признательность за єго дотеперешну діяльність на церковной и народной ниві. При том Заг. Собр. чл. чит. им. М. Качков. заявляют, што в будучности на подобного рода злы дописи на О. Канц. Полянского, рускы инстытуции и поодынокых членов отвічати не буде, бо было бы тото понижанєм власной чести.

Председатель, по вычерпаню дневного порядка, пожелал всім дальшой успішной працы и закрыл собранє.

Присутны отспівали с великим одушевленєм гимн: „Пора за Русь“!

Належит подчеркнути, што до Выділу, выбрано молодых охочих до працы людей, в чом лежит гваранция, што праца в чит. розвине ся на всіх полях скорыма кроками.

Честь и слава вам Воробличане — члены чит., за вашу стойкость и привязанє до родного имени. Держит высоко русский прапор! Памятайте, што лем порыв лучной волі и оден такт всіх сердец принесє успіх Тож сміло до дальшой працы на народной ниві. Больше бодрости, віры в свои силы, а победы духа не за горами!

До труда зараз от сегодня!

А за то, штоб мы дождали ся
Свого Великодня!


С в о й.



ДАЛЬШИ ПОЖЕРТВОВАНЯ НА ПРОЦЕС В ДІЛІ РУСКОЙ БУРСЫ ИМ. В. М҃ЙСКОГО В НОВОМ САНЧІ.

Ексцеленция Апостольский Администратор 20 зл., Алекс. Гнатышак 5 зл., О. Емилиян Венгрынович 5 зл., Читальня им. М. Качковского в Котові 5 зл. С коляды в Лосю горл. повіта 30.20 зл., Василь В. Карел, Лосє 5 зл. дальше по 2 зл. жертвовали: Михаил Москва, Андрей Галь, Михаил М. Паль, Петро Малецкый, — Василь Рогоц 1.15 зл. всі с Лося. Збором занял ся г. Василь Рогоц.

С коляды воспытанников Руской Бурсы в Горлицах пожертвовано 8 зл., г-н Роман Максимович 2 зл., г-н Иван Пелеш — Липна 1 зл., Чит. им. М. Качк. в Мохначці Нижной 10 зл., г. Петро Зяя Мохначка нижна 2 зл. Всім „колядникам“ и тым, котры заняли ся збором, а также всім жертводателям выділ бурсы складат сердечне: „Бог заплать“!



КОЛЯДА УЧЕННИКОВ РУСКОЙ БУРСЫ В ГОРЛИЦАХ.

Воспитанники Руской Бурсы в Горлицах ходили в день Богоявленя Г. с „вертепом“ в с. Лосю, где их барз сердечно приняли. Собрано на ціли бурсы суму 38.05 зл. Пожертвовали: Василь Евусян 5 зл.; по 2 зл.: Гр. Евусяк, П. Евусяк, Ю. Шлянта, П. Фекула, М. Галь и А. Галь; по 1.50 зл.: о. Хилляк и г. Жидяк; В. Карел 1.40 зл.; по 1 зл.: Е. Галь, П. Малецкий, Г. Шлянта, Горник, Кондратик, Москва, И. Дудра и М. Евусяк; С. Шлянта 0.65, Кроль 0.60; по 50 гр. П. Дутка, Ю. Фуртак, А. Телех, Гыжа, Кондратик, Спольник, Долинский, С. Евусяк, Трэмбач, Палюх, М. Хома и Рогоц. Решта дробны пожертвованя.

В Горлицах собрано 10 зл.

С общей сумы отділено 8 зл. на Руску Бурсу в Новом Санчи, 5 зл. на памятник Сандовичам, а решту обернено на подписку газет, библиотеку и сцену.

Всім жертводателям складаме глубокую и сердечную благодарность. Также дякуеме г. Евсяку Гр. за отставленє воспитанников до Горлиц.

Заряд Руской Бурсы
в Горлицах.



ПОЧТОВЫЙ ЯЩИК:

Кум Гриц, Ропкы: Може оно и так єст в селі, як вы пишете, але тото ваше письмо не надає ся до газеты, долге, ровлекле и неясне.

Заряд школы — Складисте: Штобы открити читальню им. Качк. треба сойти ся 7—10 особам старшим (господарам), котры, яко члены основателі подписуют просьбу слідуючого содержания: „До Головной Управы Общества им. М. Качковского во Львові“, Валова 14. — Мы низше подписаны, господары села почта, яко члены-основателі просиме о основанє у нас читальні и о высылку нам всіх потребных статутів и друков на адрес” В присланом поученю сут точны даны, як треба дальше поступати.



В неділю дня 9. лютого 1936

о год. 2 попол. отбуде ся в Кункові пов. горлицкого в домі читальні

Обще Собранє

ЧЛЕНОВ ЧИТ. ИМ. М. КАЧКОВСКОГО,
на котре выдїл запрашат всіх рускых интеллигентов и людей с сусідных сел.

Порядок собрания:

- 1) Открытє собрания и выбор презыдии.
- 2) Отчитанє протокола с послідного собрания.
- 3) Доклад касовый и с діятельности выдїла и удїленє абсолютории.
- 4) Выбор нового выдїла.
- 5) Внесеня членов.

По собраню аматорске представленє и забава с танцами.

Секретар:
І. Співак

Предсідатель:
К. Цеклиняк

Што чути в світі.

Москва: Совітска агенция телеграфична доносит с Гуриєва, што сильный вітер оторвал от берега и унес на полне море брылу льду, на котрой находило ся 1680 рыбаков и 1486 коней. Рыбаки мают надательный аппарат радиовый и удержуют стальной контакт с містом Гуриєвом. Они доносят, же мают корм и опал на 40 дней. С Гуриєва выслано спасат. льну экспедыцию.

Прага: Газета „Socialdemokrat“ подає с Берлина сензацийну вість о хвороті Гитлера, у котрого лікары мали сконстантовати рак горла. Вселюдно бесідуют, што вирізанный в прошлом року у него полип, оказал ся в дійности раком. Тепер звернено ся до килькох найлучших спеціалістов світа, штобы подняли ся лічити Гитлера.

В Полудневой Америкі пануют тепер незвычайно сильны морозы, котры доходят до 50 градусів низше зера. В послідных трох днях занотовано 129 смертей от замерзненя. Замерз также найбільший на світі спад воды на ріці Ниягара.

Шангай: Калган, столица Внутренной Монголии єст занятый через войска японско-манджирскы. Отділы кытайскых войск выцофуют ся постепенно с того міста. Также урядников кытайскых заступуют урядниками монгольско-манджурскыма. Калган лежит в отдаленю 150 км. от Пекина.

Нью-Йорк: На конгресі рады народной американскых жидов, делегат англицкий заявил, же американскы и англицкы жиды зберают фонд в высоті 15 миллионов долларов на запомогы для 100.000 жидов, эмигрантов с Німеччины.

Атены: Оголошено результат выборов до парламента в Греции. На 300 послов партия Венизельоса має 127., народна партия Тсальдариса 69., сторонники Кондылиса 63., комунисты 15., решта --- малы партии.

Турецке правительство затвердило пляны на будову величезного моста, висячого над Босфором, котрый получит Европу с Азиом. Мост має быти долгый на 2650 метров, с чого 700 метров буде ся операти на сильных столбах над самым Босфором. Будова має быти окончена в 3 літах и має коштвати 12. миллионов турецкых фунтов.

В будучности буде можна без пересідкы іхати поїздом с Парыжа до Багдада або Каиро.

Відень: В тых днях доручит посол чехословацкий в Варшаві польскому министру заграничных діл ноту, котра єст отвітом на польску ноту с листопада м. р. В ноті той заявит правительство чехословацке, же годит ся передати конфликт польско-чеський Лигі Народов, або поддаст ся арбитражному судови.



Телеграма.

Справа процесу о реальность „Руской Бурсы“ в Новом Санчі отходит уж от Апелляцийного Суда в Кракові до Верховного Суда в Варшаві, где буде уж тепер тот 12-літний процес оковченый.

До дня 12-го того місяца мусит быти друга оплата процесова в высоті 246 зл. заплачена

и то буде уж послідный выдаток процесовый.

Понеже с многих громад, где собрано „коляды“ або их части на процесовы выдаткы, ище тых грошей не прислано, а в гдехотрых селах люды их собі распожичили — упрашаме **сейчас** их переслати, а заразом просит ся о дальши пожертвованя.

Выказ жертв и рахунок процесовых коштотв буде оголошений в „Лемку“ и в „Землі и Волі“.

Гроши просиме присылати, як и до тепер, до редакции газеты „Лемко“, або на адрес предсідателя О-ва Руска Бурса в Н. Санчі — О. Романа Прислопского в Жегестові.



КТО ХОЧЕ ЗАБЕЗПЕЧИТИ СЯ
НА СТАРОСТЬ, АБО ЗЛОЖИТИ ДІТЯМ
ПРИДАНЕ, НАЙ
заасекурусє ся
в Асек. Товаристві
Вита и Краковске
во ЛЬВОВІ

В ЛЮТЫМ НАЧНЕ СЯ В КРЫНИЦІ СЕЛІ

КУРС ВЫПРАВЫ ОВЕЧИХ СКОР,

КОТРЫЙ БУДЕ ТРЕВАТИ 6 НЕДІЛЬ.

— Оплата за курс выносит 2.50 зл. от участника. —
Каждый курсант мусит принести с собом дві овечи скоры
до выправы.

